

## 每週經課朗誦經文(巴克禮台語漢字)2012/11/11

### 共同經課 - 1

#### 路得記三章一節~五節、四章十三節~十七節

1 伊的乾家拿俄米給伊講：「我的查某子啊，我豈毋著給你尋一個安身的所在，互你享福嗎？2 你及伊的女婢做陣的波阿斯，伊豈毋是咱的該親嗎？看啊，伊今暝簸大麥佇五穀場；3 你著洗身軀抹油，換衫，落去到五穀場，總是毋通互彼人認著你。聽候伊飲食明白，4 到伊倒啲的時，你著斟酌看伊倒的所在，就入去掀伊的腳所蓋的，倒佇遐，伊欲給你講，你所著行的。」5 伊就講：「你所吩咐的，我攏欲行伊。」13 對按呢，波阿斯娶路得做某，已經及伊同房。耶和華互伊懷孕生一個子。14 許個婦仁人對拿俄米講：「耶和華是應該謳嘞的！因為伊今仔日無放揀你，致到你無至親的人。願此個囡仔佇以色列中得著名聲。15 伊欲復倒你的精英，奉養你的年老，因為生伊者就是你彼個疼你的媳婦。對佇你比七個子猶卡好的！」16 拿俄米抱彼個囡仔下佇伊的胸前，育伊親像老母。17 厝邊許個婦仁人就給伊號名講：「拿俄米有得著囡仔啦！」就叫伊的名俄備得。伊是耶西的老父，耶西是大衛的老父。

### 共同經課 - 2

#### 詩篇一百二十七篇

1 〔上崎仔的詩，所羅門所做的。〕厝宅若毋是耶和華起造，起造伊的人就空空著磨；城池若毋是耶和華顧守，就顧守的人空空警醒。2 恁早早起，晏晏暈，食勞祿所得著的飯，亦是空空；耶和華所疼的人，伊欲互伊好暈。3 看啊，子兒是耶和華所賞賜的產業；懷孕的胎是伊所互伊的報賞。4 少年的時所生的子，親像勇士手中的箭。5 伊的箭袋充滿的人有福氣；In佇城門口及對敵講話，的確不致見誚。

### 共同經課 - 3

#### 希伯來書九章二十四節~二十八節

24 因為基督毋是入人的手所造的聖所（做真聖所的影像的），就是入佇真的天，今為著咱諸個顯現佇上帝的面前；25 伊亦免用家己沓沓獻，親像許個祭司頭逐年用牛羊的血入諸個聖所，26 若按呢，就基督對創造世間以來，著沓沓受苦。獨獨今佇諸個世代的路尾，伊一擺出現，獻本身做祭，來除去罪。27 閣照所註定的，人有一擺死，以後有審判。28 按呢，基督已經一擺抵著獻，來擔當多多人的罪過，欲第二擺對向望伊的人出現來救in，彼時出現及罪無干涉。

### 共同經課 - 4

#### 馬可福音十二章三十八節~四十四節

38 耶穌教示的時，閣講：「著持防許個經學士；in愛穿長衫四界行，愛佇街市裡互人請安，39 會堂內坐高位，筵桌裡坐大位。40 in僥吞守寡人的家伙，假意長長祈禱。in欲受罪閣卡重！」41 耶穌坐佇庫房的對面，眾人啲用錢穴落庫房。有多多富人用多多錢穴落去。42 有一個喪鄉的守寡人來，穴二個半厘的，就是一厘。43 耶穌就叫伊的學生來，給in講：「我實在給恁講，此個喪鄉的守寡人所穴的，比眾穴落庫房的卡多。44 因為，許個眾人是對in有剩的，來穴；若是此個婦仁人是對佇伊的無夠，來一盡穴伊所有的，就是伊所倚靠來活的。」